

唐詩紀事

唐詩紀事

唐詩紀事卷第十五

王灣

魏知古

許景先

姚崇

姜皎

姜晞

王岳靈

楊顏

鄭絲

張謩

趙仁獎

張翬

金昌緒

蘇晉

張九齡

崔國輔

王灣

奉使登終南山詩云常愛南山遊因而盡原隰數朝至林嶺百仞登鬼岌
石壯馬徑窮苔色步緣入物奇春狀改氣遠天香集虛洞策杖鳴低雲拂
衣溼倚巖見廬舍入戶欣拜揖問性矜勤勞示心教澄習玉英時其飲芝
草爲余拾境絕人不行潭深鳥空立一乘從此受九轉兼是給辭處若輕
飛憩來唯吐吸閒襟超已勝迴路倏而及煙色松上深水流山下急漸平
逢車騎向晚睨城邑峯在野趣繁塵飄宦情緝辛苦久爲吏勞生何妄執
日暮懷此山悠然賦斯什

閏月七日織女云耿耿曙河微神仙此會稀今年七月閏應得兩迴歸

灣登先天進士第開元初為滎陽主簿馬懷素欲校正羣籍灣在選中各

部撰次後為洛陽尉商璠云灣詞翰早著為天下所稱最者不過一二遊

吳中江南意云海日生殘夜江春入舊年詩人以來無聞此句張公居相

府手題于政事堂每示能文令為楷式又搗衣篇云月華照杵空悲妾風

響傳砧不見君所有衆制類咸若斯非張蔡之未見也覺顏謝之彌遠乎

江南意云南國多新意東行伺早天潮平兩岸失風正數帆懸海日生殘

夜江春入舊年從來觀氣象惟向此中偏毛本云一作次北固山下客路

闊風正一帆懸海日生殘夜江春入舊年鄉書可處達歸雁洛陽邊

麗正殿賜同宴用天前煙年四韻應制云金殿忝陪賢瓊羞忽降天鼎羅

仙掖裏觴拜鎖闈前院逼青霄路樹和紫禁煙酒酣空抃舞何以答昌年

秋夜寓直即事懷贈蕭令公裴侍郎兼通簡南省諸友人云聖主萬年興

賢臣數載升古靈傳岳秀宏量稟川澄畿甸舉長策風霜秉直繩出車遙

俗振登閣滿朝稱賦簡流亡輯農安政理憑還家新長幼巡隴舊溝塍忠
梗大勳立衰羸墮業懲焚香兼御史懸鏡委中丞旗隼當朝立臺驄登郡
乘司徒漢家重國典潁川徵雲路俄平入台階忽上陵秉鈞調造化宣綽
慰黎蒸金省方秋作瑤軒直夜凭中書贈陳準右相簡王陵三傑賢更穆
百僚歡且兢搖懷及賓友計里辨溜澗闔暝陰散句陳爽氣凝月深宮
樹轉河近禁樓冰卑吏夙驅策微涓効斗升望麾宵繼火書板曙懷蒸彼
此雖流盼規模轉伏膺惠將霄漢隔勞或歲時矜位重恩寧濫才輕懾不
勝林巒甘獨往疵賤苦相仍敢忘銜花雀思同附驥蠅平生逐鳥雀何日
似蒼鷹

晚春詣蘇州贈武員外云蘇臺憶季常飛棹歷江鄉恃此功曹掾初離華
省郎貴門生禮樂明代秉文章嘉璧位先進洪儒名重揚爰從姻戚貶豈
失忠信防萬里行驥足十年睽鳳翔迴遷翊元聖入拜佇惟良別業對南
浦羣書滿北堂意深投轄盛才重接筵光陋學叨鉛簡弱齡許翰場神馳

勞舊國顏展別殊方際曉雜氛散殘春衆物芳煙和疎樹滿雨續小溪長
旅拙感成慰通賢顧不忘從來琴曲罷開匣爲君張

晚夏馬升卿池亭卽事寄京中二三知己云忝職畿甸淹濫陪時俊後才
輕策疲劣勢薄常驅走牽役勞風塵秉心在巖藪崇賢開別業形勝代希
偶竹繞清渭涓泉流白渠口逡巡期賞會揮忽變星斗逮此乘務餘因而
訪幽叟入來殊景物行復洗紛垢林靜秋色多潭深月光厚盛香蓮近折
新味瓜初剖滯拙懷隱淪書之寄良友

奉同賀監林月清酌云華月當秋滿朝英假興同淨林新霽入窺院早涼
通碎影行筵裏搖花落酒中清霄凝爽意併此助文雄

觀搗箏云虛室有秦箏箏新月復清絃多弄委曲柱促語分明曉怨凝繁
手春嬌入慢聲近來惟此樂傳得美人情

毛本云一作祖詠

魏知古

知古深州人相睿宗薦洹水令呂太一蒲州司功參軍齊澣內率騎曹參

軍柳澤密尉宋遙左補闕袁暉右補闕封希顏伊闕尉陳希烈後皆爲聞人

玄元觀尋李先生不遇詩云羽客今何在空尋伊洛閒忽聞歸苦縣應想入函關未作十年別猶應七日還神仙不可見寂寞返蓬山

奉和春日途中喜雨應詔詩曰豫遊欣勝地皇澤乃先天油雲陰御道膏雨潤公田隴麥霑逾翠山花溼更然稼穡良所重方復悅豐年

春夜寓直鳳閣懷羣公詩云拜門傳漏晚寓省索居時昔重安仁賦今稱伯玉詩鴛池滿不溢鷄樹久逾滋夙夜懷山甫清風詠所思

先天中爲侍中從獵渭川獻詩曰嘗聞夏太康五弟訓禽荒我後來冬狩三驅盛禮張順時鷹隼擊講事武功揚奔走未及去翽飛豈暇翔非熊從渭水瑞翟想陳倉此欲誠難縱茲遊不可常子雲陳羽獵僖伯諫漁棠得失鑒齊楚仁思念禹湯邕熙諒在宥亭毒匪多傷辛甲今爲史虞箴遂孔彰手詔褒之

知古卒宋璟歎曰叔向古遺直子產古遺愛兼之者其魏公乎

許景先

常州人先獻賦李迥秀見之歎曰是宜付太史後與齊澣王邱韓休更知制誥張說曰許舍人之文雖乏峻峯激流然詞旨豐美得中和之氣天寶閒以吏待卒陽春怨云紅樹曉鶯啼春風暖翠閨雕籠薰繡被珠履踏金堤芍藥花初吐菖蒲葉正齊藁砧當此日行役向遼西送張說巡朔方應制云文武承邦式風雲感國禎王師親賦政廟略久論兵漢主知三傑周官統六卿四方分闡受千里坐謀成介冑辭前殿壺觴宿左營賞延頒賜重宸賜出車榮龍武三軍氣魚鈐五校名郊雲駐旌兩邊吹引金鉦振旅方稱德安人更克貞佇觀銘石罷同聽凱歌聲

姚崇

享龍池樂章云恭聞帝里生靈祉應報明君鼎業新既叶翠泉光寶命還符白水出真人當時舜海潛龍躍此日堯河帶馬巡獨有前池一小雁叨

承舊惠入天津又云帝宅王家大道邊神馬潛龍涌聖泉昔日昔時經此地
地看來看去漸成川歌臺舞榭宜正月柳岸梅洲勝往年莫疑沙上春雲
少祇爲龍飛直上天龍池興慶宮池也明皇潛龍之地張九齡撰龍池頌
刊石興慶宮玄宗以爲不稱更命嗣澤王璆爲頌建花萼樓北初睿宗五
子賜第隆慶坊號五王宅明皇爲太子製大衾長枕將與諸王共之睿宗
喜甚明皇先天後盡以隆慶舊邸爲興慶宮而賜憲薛第于勝業申岐第
于安興環列宮側天子于宮西南置樓西曰花萼相輝南曰勤政務本
張曲江有和姚令公哭李尙書詩姚亦時有述作然少見于世

口箴云君子欲訥吉人寡辭利口作戒長舌爲詩斯言不善千里違之勿
謂可復駟馬難追惟靜惟默澄神之極去甚去泰居物之外多言多失多
事多害聲繁則淫音希則大室本無暗垣亦有耳何言者天成蹊者李似
不能言爲世所尊言不出口冠時之首無掉爾舌以速爾咎無易爾言亦
孔之醜欽之慎之可大可久欽之伊何三命而走慎之伊何三緘其口勉

哉夫子行矣勉旃書之屋壁以代章紘

李德裕舌箴序曰余宿于洞庭西夢與中書令姚公偶坐如舊相識問余曰君見僕所作口箴乎余對曰去歲居守東周于公會孫諫議邵處觀金石之刻遂莞爾而笑曰孫子猶能藏之又曰余感姚公之夢乃爲舌箴云

姜皎

享龍江樂章云龍池初出此龍山常經此地謁龍顏日日芙蓉生夏水年年楊柳變春灣堯壇寶匣餘煙霧舜海漁舟尙往還願似飄飄五雲影從來從去九天閒又曰龍興白水漢興符聖主時乘運斗樞岸上丰茸五花樹波中的皦千金珠操環昔聞迎夏啓發匣先來瑞有虞風色雲光隨隱見赤雲神化象江湖

皎長安中爲尙衣奉御明皇在藩邸識其有非常度委心焉及卽位授殿中少監出入臥內開元十年爲祕書監坐洩禁中語流欽州道死

姜晞

龍池樂章云靈沼縈迴邸第前浴日涵春寫曙天始見龍臺昇鳳闕應如
霄漢起神泉石匱渚傍還啓聖桃李初生更有仙欲化帝圖從此受正同
河變一千年又云乾坤啓聖吐龍泉泉水年年勝一年始看魚躍方成海
卽覩龍飛利在天洲渚遙將銀漢接樓臺眞與紫微連休氣雲光常不散
懸知此地是神仙

晞上邳人登永隆二年進士第

王岳靈

聞漏詩云建禮含香處重城待漏晨徐聞傳鳳詔曉唱辨雞人銀箭殘將
盡銅壺漏更新催籌當午夜移刻及三辰杳杳從天遠泠泠出禁頻直宜
殘漏曙肅肅對鈎陳

岳靈登開元進士第天寶十年爲監察御史撰張惡子廟碑

楊顏

田家云小園足生事尋勝日傾壺蒔疏利于鬻纔青闌已無四鄰因野竹

日夕採其枯田家心適時春色徧桑榆
顏登開元進士第

鄭繇

失白鷹詩云白錦文章亂丹霄羽翮齊雲中呼暫下雪裏放還迷梁苑驚
池鷺陳倉拂野雞不知寥廓外何處獨飛棲

開元初經慈澗題詩云岸與恩同廣波將慈共深涓涓勞日夜長似下流
心

繇鄭州人登嗣聖元年進士第開元時岐王範愛儒士繇與劉廷琦閻朝
隱張諤皆遊其門飲酒賦詩相娛樂子審有詩名終于袁州刺史與杜子
美善

張諤

九日詩云秋來林下不知春一種佳遊事也均絳葉從朝飛著夜黃花開
日未成旬將橫陌樹頻驚馬半醉歸途數問人城遠登高併九日茱萸凡

作幾年新謬登景龍進士第岐王範好儒士與閣朝隱劉廷琦鄭絲等飲酒賦詩駙馬都尉裴虛已善識緯坐私與範游徙嶺南廷琦貶雅州司戶謬山荏丞然明皇于範無閒也

趙仁獎

令乘驄馬去丞脫繡衣來仁獎送上蔡令潘好禮拜御史詩也或訝其假手蓋仁獎住王戎墓側善歌黃鸝景龍中負薪詣闕云助國調鼎卽除臺官中書令姚崇曰此是黃鸝助授以當州一尉惟以黃鸝自銜宋務光嘲之曰趙仁獎出王戎墓下入朱博臺中舍彼負薪登茲列柏行人不避驄馬坐客惟聽黃鸝忽一夫負兩束薪曰此合拜殿中人問其由曰趙以一束拜監察此兩束合授殿中

張翬

遊棲霞寺云躋險入幽深翠微含竹殿泉聲無休歇山色時隱見潮來雜風雨梅落成霜霰一從方外遊頓覺塵心變

潤州延陵有包融儲光羲曲阿有丁仙芝緱氏主簿蔡隱邱監察御史蔡希周渭南尉蔡希寂處士張彥雄張潮校書郎張翬吏簿常選周瑀長洲尉談戴句容有殷遙硤石主簿樊晃一作光橫陽主簿沈如筠江寧有右拾遺孫處元一作立處士徐延壽丹徒有江都主簿馬誕武進尉申堂構十八人皆有詩名殷璠次爲丹陽集翬開元進士蕭穎士同年生也蕭穎士有張翬下第歸江東詩云俱飛仍失路綵服邇清波地集東南美朝遺甲乙科客愁千里別春色五湖多明日舊山去其如相望何

金昌緒

春怨詩云打卻黃鶯兒莫教枝上啼幾迴驚妾夢不得到遼西

顏陶取此詩爲唐類

詩毛本云一作蓋嘉運伊州歌者非也然此詩爲嘉運所進編入樂府後乃誤爲嘉運作耳

蘇晉

晉中宗戶部尙書珣之子數歲知爲文吏侍房穎叔舍人杜暹當國表宋璟爲吏書晉齊澣爲侍郎世爲臺選過賈六詩云主人病且閒客來情彌

適一酌復一笑不知日將夕昨來屬歡遊于今盡成昔努力持所趣空名
定何益

丞相少傅拜職天子作三傑之詩以宴命晉序云惟聖寶賢以齊皇極有
若左丞相燕國公左丞相廣平公太子少傅安陽侯皆生人碩德皇國元
老道著廊廟績宣華戎由是懋其成功錫以元圭咨曰于朔擇時于秋俾
對命王庭受職公府見羣屬揖庶寮禮官辨章掌舍陳次瞽工備樂侑饗
獻蒸六卿拜下以成儀三事自天而來賀秩秩賓序暉暉旅疇玉緯垂文
南風和雅頌之變金漿降醴雲天光飫酌之宜宰德貴和盡莊敬具瞻之
範羣情尙洽預周旋宴語之歡方將一心天工戮力帝載寢黑山之柝包
青海之戈雲雨賢才水火菽粟日詠魚藻歲陳由庚頤殷趙之年留魯陽
之景爰命在宴乃賡載歌時左相張說右相宋璟太子少傅源乾曜同日
上官命宴於東堂明皇賜詩曰赤帝收三傑黃軒舉二臣故序及之
送張說巡邊應制云方漢比周年興王合在宣亟聞降虜拜復覩出師篇

圻父萬邦式英猷三略傳算車申夏政芟舍啓戎田嚴問盟胡苑軍容濟
洛川皇情悵關旆詔餞列郊筵路接禁園草池分玉井蓮離聲軫去角居
念斷歸蟬三捷豈云爾七擒良信然具寮誠寄望奏凱秋風前

張九齡

在郡秋懷二首秋風入前林蕭瑟鳴高枝寂寞游子思寤歎何人知宦成
名不立志存歲已馳五十而無聞古人深所疵平生去外飾直道如不羈
未得操割効忽復寒暑移物情有固然身退毀亦隨悠悠滄江渚望望白
雲涯露下霜且降澤中草披離蘭艾若不分安用馨香爲又云庭蕪生白
露歲候感遐心策蹇慙遠塗巢枝思故林小人恐致寇終日如臨深魚鳥
好自逸池籠安所欽掛冠東都門採蕨南山岑議道誠愧昔覽分還愜今
慙然憂成老空爾白頭吟

感遇云蘭葉春葳蕤桂華秋皎潔欣欣此生意自爾爲佳節誰知林棲者
聞風坐相悅草木有本心何求美人折

段成式云桂花三月生黃而不
白曲江云桂花秋皎潔妄矣

又

云幽林歸獨臥滯慮洗孤清持此謝高鳥因之傳遠情日夕懷空意人誰
感至精飛沈理自隔何所慰吾誠又云魚遊樂深池鳥棲欲高枝嗟爾蜉
蝥羽薨薨亦何爲有生豈不化所在奚若斯神理日微滅吾心安得知浩
歎楊朱子徒然泣路歧又云孤鴻海上來池潢不敢顧側見雙翠鳥巢在
三珠樹矯矯珍木顛得無金丸懼美服患人指高明逼神惡今我遊冥冥
弋者何所慕又云吳越數千里夢寐今夕見形骸非我親衾枕卽鄉縣化
蝶猶不識川魚安可羨海上有仙山歸期覽神變又云抱影吟中夜誰聞
此歎息美人適異方庭樹謝幽色白雲愁不見滄海飛無翼鳳凰一朝來
竹花斯可食又云漢上有游女求思安可得袖中一書札欲寄雙飛翼冥
冥獨不見耿耿徒緘憶紫蘭秀空蹊皓露奪幽色馨香歲欲晚感歎情何
極白雲望南山日暮長太息

九齡在相位有謬謬匪躬之誠明皇旣在位久稍怠庶政每見帝極言得
失林甫時方同列陰欲中之將加朔方節度使牛仙客實封九齡稱其不